

Առաջ նրանց արդիւնքը ծախսւում էին ուրիշ բարեգործական նպատակների համար, իսկ այժմ կը ծախսենք մեր ժողովրդի զաւակների կրթութեան համար: Ժողովրդից ստացածը կրկին կը վերադարձնենք ժողովրդին:

— Դուք կարծում եք, Յայրիկ, միայն կրթութիւնը բաւական է լինի, — հարցրեց Ասլանը:

— Բաւական չի լինի, — պատասխանեց Յայրիկը: — Ժողովրդի զաւակներին ուսում տալով եւ նրանց միջոցներ չտալով իրանց համար ապրուստ գտնելու, մենք միայն կը պատրաստենք ուսումնական թշուառներ: Աղքատութիւնը այդ ժամանակ աւելի զգալի է լինում, որովհետեւ որքան աւելանում է մարդու մտաւոր զարգացումը, այնքան աւելանում են եւ նրա կենսական պահանջները: Ռամիկը մի կտոր ցամաք հացով գոհ է մնում, բայց երբ այբ ու բենը մտցրիր նրա գլխում, նա կը հասկանայ, որ միսը աւելի սնունդ է տալիս: Եւ սեւ կը լինի նրա օրը, եթէ միս գտնել չկարողանայ:

Ես զարմանում էի այդ եկեղեցականի դատողութիւնների վրայ. նա բոլորովին հակառակն էր ասում, ինչ որ խօսում էին միւս եկեղեցականները. նա չէր քարոզում աշխարհի ունայնութիւնը, նա չէր պախարակում կեանքի վայելչութիւնները, պնդելով, թէ մարմինը զրկելով, մարդիկ աւելի մօտենում են երկնքին, ուր պետք է սպասել իսկական երջանկութիւնը:

— Այո՛, — աւելացրեց Ասլանը, — ուսումը պետք է լինի միջոց կեանքի իրական պահանջները հայթայթելու համար: Ասացեք, ինդրեմ, Յայրիկ, ո՞րն է ձեր կարծիքով ժողովրդի այժմեան ամենաանհրաժեշտ պահանջը, կամ, այլ խօսքով, ինչո՞ւմն է նրա գլխաւոր հիւանդութիւնը, որը շուտափոյթ բժշկութեան կարօտ է:

Կարծես տխրութեան մի ամպ անցաւ Յայրիկի պայծառ դեմքի վրայ, եւ նրա գոյնը մռայլեցաւ:

— Մեր ժողովրդի հիւանդութիւնը, — ասաց նա, — այնքան բազմատեսակ է եւ բաղադրեալ, որ անկարելի է մի քանի խօսքով բացատրել, պարոն բժշկապետ: Բայց ձեզ, որպէս բժշկի, աւելի հասկանալի պետք է լինի, երբ հիւանդութիւնները բաղադրեալ են, այդ դէպքում, գտնում են ամենագլխաւորը, որ մահ է սպառնում հիւանդի կեանքին, եւ նրանից են սկսում բժշկութիւնը:

— Այդ իրաւ է: Բայց ո՞րն է գլխաւոր հիւանդութիւնը:

— Իմ կարծիքով գաղթականութիւնը: